

Naqqiut 3

Siunnersuut- Maajip 24-at 2018-meersoq taarserpaa
(Siunnersuummi § 2, imm. 1 naqqiuteqartoqarpoq. Inatsisip atuutulerfissaa naqqiiner
tunngassuteqarpoq, “ulloq 1. Juli 2018” allangortinneqarami “ulloq 1. Januar 2019-
inngorluni, naqqiuteqarnermi peqquteqarpoq qallunaat folketingianni ulloq atuutilerfissaa
suliarineqaaqqaassamat. Naqqiummi 2-mi ullup atuutulerfissaanut tunngasunik
naqqiisoqarpoq).

Naalakkersuisut matumuuna saqqummiuppaat aalajangiiffigisassatut siunnersuut Inatsisartut suleriaasianni § 33 naapertorlugu:

Kalaallit Nunaanni sulisilluni ajoqusersinnaanermut isumannaarineq pillugu inatsisip allangortinneqarnera pillugu Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut.

(Utoqqalinersiuteqalernissamat ukiut qaffakkiartortinneqarnissaasa malitsigisaanik allannguut)

(Aatsitassanut, Suliffeqarnermut Nunamullu Namminermut Naalakkersuisoq)

Tunngavilersuut

Inatsisissatut siunnersuutip matuma siunertaraa nunatsinni sulisilluni ajoqusersinnaanermut isumannaarineq pillugu inatsisip allangortinneqarnissaa, taamaalilluni sulisinnaassutsimik annaasaqarnermi aamma pilersuisoqarnermik annaasaqarnermi taartisiaaqaartitsineq, ullumikkutut ukiunut aalajangersimasunut killiligaanngitsunik, kisiannili utoqqalinersiuteqalernissap tungaanut akilersorneqarsinnaasunik.

Sulisilluni ajoqusersinnaanermut isumannaarisarnermut inatsimmi maanna Kalaallit Nunaanni atuuttuusumi malittarisassaqaarpoq sulisinnaassutsimik annaasaqarnermut taartisiaqaartarnermut aamma pilersuisuimik annaasaqaartarnermut taartisiaqaartarnermut, akilersorneqaartartunik ajoqusersimasup qimataasulluunniit “65-inik ukioqalernissaannut”.

Utoqqalinersiaqarneq pillugu Inatsisartut inatsisaanni ukiut utoqqalinersiuteqarfiusartut 2017-imiit qaffanneqarput 65-iniit 66-inik ukioqalernermut. 1. januar 2021-imiit ukiut utoqqalinersiuteqarfiulersartut qaffaqinneqassapput 67-inut.

Maanna nunatsinni sulisilluni ajoqusersinnaaneq pillugu inatsimmi ajoqusersimasut qimataasullu misigisassavaat taartisiaassat isertitanut annaasanut pilersuisuunermullu akilerneqartarunnaarneri 65-inik ukioqalernermi. Taartisiaassanik akilersuineq unittassamat soraarninngornissaq ukiumik ataatsimik aammalu 2021-imiit ukiunik marlunnik sioqqullugu.

Piffissami taartisiassanik akilersuinerup uninneraniit soraarninngortussatut ukioqalernissamut ajoqusersimasoq imaluunniit akornutissarsisimasoq taartisiassaminik akiliivigineqartarani utoqqalinersiuteqaranilu inissisimasassaaq, taamaattumillu amerlasuutigut aningaasaqarnikkut toqqammavissaaruttoqartarluni.

Kalaallit Nunaanni sulisilluni ajoqusersinnaanermut isumannaarineq pillugu inatsimmi allannguutissatut siunnersuummi siunnersuutaasoq naapertorlugu taartisiassat “utoqqanilersiuteqalertussatut ukioqalernissap” tungaanut akilerneqartassapput, apeqqutaatinnagu ukiut utoqqanilersiuteqarfiulersussat suut Inatsisartut inatsisaanni aalajangerneqarnersut.

Taamaasillunilu siunnersuut manna Kalaallit Nunaanni inatsimmut atuuttumut sanilliullugu teknikkikkut pitsanngoriaateqarpoq.

Siunnersuummi sernissorpai inuit inuussutissarsiorsinnaanerminnik annaasaqarsimasut imaluunniit pilersuisuminnik annaasaqarsimasut aningaasaqarnerat illersorniarneqarpoq.

Imai

Kalaallit Nunaanni sulisilluni ajoqusersinnaanermut isumannaarineq pillugu inatsisimmi allannguutissatut siunnersuutikkut piuminartumik allannguinnikkut aaqqiissuteqartoqarpoq, imaalillugu sulisilluni ajoqusersimanermut imaluunniit pilersuisumik annaasaqarnermut taartisiassat akilerneqartalissallutik “utoqqanilersiuteqartussatut ukioqalernissamut”, maannakkut aaqqiissuussinerusoq pisartagallip “65-inik” ukioqalernera tikillugu pisartagaqartarneq qimallugu.

Allannguneq §§-ini 21, 24 aamma 31-imi pivoq.

Inatsimmik allannguinnikkut qularnaarneqassaaq taartisiassat akilersorneqartussat soraarnerussutisiaqartussatut ukioqalernissap tungaanut akilersorneqartarnissaat, taamalu siunissami piffissamik taartisiassaqarfiunngitsumik soraarnerussutisiaqarfiunngitsumillu peqartussaajunnaarlugu.

Inatsisissatut siunnersuummut nassuiaatini nalunaarneqarpoq aalajangiinernik 85-it missaannik suliaqartoqartarsimasoq, oqaasertaliussat allannguutaanni sunniuteqartussanik, taamalu akilersuisarneq ingerlanneqarsinnaanngorlugu 65-inik ukioqalernerneq tikiinnarnagu.

Inatsimmik allannguisoqanngippat suliani 85-imi pineqartuni akilersuineq 65-inik ukioqalernerneq unitsinneqartassagalarpoq. Inuit tassani pineqartut

soraarnerussutisiassaminnik akilerneqartassanngikkaluarput, utoqqanilersiuteqarnerup aallartittarnera Inatsisartut inatsisaanni 66-inik ukioqalernermeersuummut, aammalu 1. januar 2021-imiit 67-inik ukioqalernermeersuulissalluni.

Oqaaseqaatinut ilanngullugu innersuunneqassapput inatsisissatut siunnersuummut nassuiaatit.

Namminersorlutik Oqartussanut aningaasaqarnikkut kingunerisassai

Inatsisissatut siunnersuummut nassuiaatini aningaasarsiornikkut ataatsimut inatsisissatut siunnersuutip kingunerisassai naatsorsorneqarput 10 mio. kr.-inut atortuulersitsiartuaarnermi aningaasartuutini, tamatumalu kingorna ukiumut 1 mio. kr.-inut.

Siunnersuummut nassuiaatini eqqaaneqarpoq nalornerpasissumik aningaasartuutit 40 procentii pisortani sulisitsisunut tunngasuunissaat.

Ingerlaavartumik aningaasartuutit nalinginnaasumik aningaasartuutinik taaneqarsinnaapput, soraarnerussutisiaqalertarnerup ukiuinik qaffaanermut atasut, taamalu sulisut soraarninngornissami tungaannut suliffeqaannarsinnaallutik.

Aningaasaqarnikkut aamma allaffissornikkut inuussutissarsiortunut kingunerisassai il.il.

Inatsisissatut siunnersuummut oqaaseqaatini aningaasaqarnikkut siunnersuutip kingunerisassai ataatsimut 10 mio. kr.-inut naatsorsorneqarsimapput, atortuulersitsiartuaarnermi aningaasartuutini, tamatumalu kingorna ukiumut 1 mio. kr.-inut.

Inatsisissatut siunnersuummi oqaaseqaatini nalornerpasittumik oqaatigineqarpoq aningaasartuutit 60 procentii sulisitsisunut namminersortunut tunngasuussasut.

Ingerlaavartumik aningaasartuutit nalinginnaasumik aningaasartuutinik taaneqarsinnaapput, soraarnerussutisiaqalertarnerup ukiuinik qaffaanermut atasut, taamalu sulisut soraarninngornissami tungaannut suliffeqaannarsinnaallutik.

Inassuteqaat

Naalakkersuisut inassutigissavaat Namminersorlutik Oqartussat akuersissutigissagaat Kalaallit Nunaanni sulisilluni ajoqusersinnaanermut isumannaarineq pillugu inatsisip allannguutissaa.